

'Buang sampah macam samseng'

10 hingga 15 lori buang sampah domestik ke Sungai Klang setiap hari

**NUR FARHANA
ABDUL MANAN**

PUCHONG – “Mereka buang sampah macam samseng, kalau ditegur, mereka akan buka kasut dan tunjuk pada kami seolah-olah seperti samseng,” kata Pengerusi Kuil Sri Nagamuthu Mariamman, S Ramesh berhubung tindakan segelintir pihak membuang sampah ke Sungai Klang, di sini.

Ramesh berkata, boleh dikatakan antara 10 hingga 15 lori ke tebing sungai berhampiran Taman Lindungan Jaya membuang sampah domestik setiap hari.

Yang mengecewakan pihaknya, tiada tindakan diambil walaupun aduan dilaporkan kepada pihak berwajib.

“Bukan kami tidak tegur perbuatan salah itu te-

tapi apabila ditegur, pekerja warga asing langsung tidak ambil kisah malah kami pula dimarahi.

“Setiap hari antara jam 4 hingga 6 petang pasti ada lori datang membuang sampah, lebih dikesalkan sampah itu akan ditolak masuk ke sungai oleh pekerja mereka,” katanya kegiatan pembuangan sampah dikesan sepanjang tebing sungai itu.

Penduduk Taman Mawar Seksyen 5 yang tinggal berhampiran sungai itu, Mohd Nazir Yahya, 58, berkata, isu berkenaan sudah dimaklumkan kepada beberapa pihak, namun dia kesal tiada maklumbalas positif diterima.

Katanya, isu itu pernah beberapa kali dipanjangkan kepada Jabatan Perparitan dan Saliran (JPS), Majlis Bandaraya Petaling Jaya (MBPJ) dan bebe-

rapa pihak lain.

Namun katanya, kakitangan pihak itu hanya datang melawat lokasi, mengambil gambar namun tiada tindakan diambil selanjutnya.

“Mereka hanya suruh kami menghalau orang-orang yang datang membuang sampah di situ sedangkan kami tiada kuasa untuk berbuat demikian,” katanya.

Sementara itu, Penyelaras Parlimen Puchong, Datuk Loo Yeng Peng ketika meninjau masalah itu bersama penduduk berkata, pencemaran serius berlaku akibat pelanggaran penguatkuasaan undang-undang pihak berkuasa tempatan (PBT).

Beliau mempersoalkan tindakan Kerajaan Negeri dan PBT kawasan itu kerana isu itu didakwa bukan sahaja menyebabkan masalah pen-



Penduduk menunjukkan sampah dibuang pihak tidak bertanggungjawab di tepi Sungai Klang.

cemaran sungai malah turut juga menjejaskan kesihatan penduduk.

“Saya hendak bertanya kepada Menteri Besar, Tan Sri

Abdul Khalid Ibrahim mana janji kononnya akan menjalankan projek RM10 bilion untuk mengurus, membersihkan dan mencantikkan Sungai Klang.

“Sampai hari ini tidak memberi tumpuan kepada kebersihan, biarkan pencemaran, malah tidak nampak projek itu akan dilaksanakan,” katanya.